

Karel Schoeman

Karel Schoeman was 'n geskiedenis-**ghoeroe** en die **bekroonde** skrywer van nagenoeg 55 gepubliseerde werke. Hy is as 'n **stilis** beskryf, met ander woorde 'n skrywer met 'n goeie styl. Hy het veral op **romans** en geskiedenisboeke gekonsentreer, maar het ook reisverhale en TV-tekste (draaiboeke) geskryf.

Sy boeke is in vele tale vertaal, onder meer Duits, Frans en Russies. Hy is ook een van min Suid-Afrikaanse skrywers wat met 'n staatspresidentstoekening bekroon is.

Kom ontmoet Karel Schoeman, wat in 1939 gebore is en tot 2017 geleef het, en wie se werk vandag nog voortleef. Hy het in 1999 'n Orde vir Voortreflike Diens van wyle pres. [Nelson Mandela](#) ontvang en is drie keer met die [Hertzogprys](#) vir **prosa** asook talle ander belangrike **literêre** pryse bekroon. Die Universiteit van Kaapstad het hom in 2000 met 'n **eredoktorsgraad** vereer en die Universiteit van die Vrystaat vier jaar later. ¹



Grootwordjare en studies

Karel is as Tromp Schoeman op 26 Oktober 1939 in 'n hotel op Trompsburg in die [Vrystaat](#) gebore. Daar is nie baie inligting oor sy pa beskikbaar nie, maar ons weet wel dat sy pa 'n **handelsreisiger** was. Sy ma was 'n Nederlander en haar **nooiensvan** was Van Rooijen. Familienaam was in daardie jare gebruiklik, maar sy ma wou nie vir hom een gee nie en het hom Tromp genoem. Hy het egter regdeur sy lewe dié naam **verpes** en het homself Karel begin noem. Hy het as universiteitstudent sy naam amptelik na Karel verander. ²

Sy ma het hom met Nederlands as sy moedertaal grootgemaak, [Afrikaans](#) as sy tweede taal en Engels as sy derde taal.



Sy ouers is geskei toe hy drie jaar oud was en hy en sy ma het na die dorp Paarl in die [Wes-Kaap](#) getrek. Hy het nooit weer sy pa gesien nie. Schoeman het in Paarl

by Laerskool W.A. Joubert skoolgegaan en het in 1956 aan die Hoër Jongenskool matrikuleer.

Schoeman en sy ma het in 1975 na Bloemfontein verhuis en hy het daar aan die Universiteit van die Oranje-Vrystaat begin studeer. Hy het in 1959 'n BA-graad met Engels, Afrikaans en Nederlands as hoofvakke behaal.

Hoewel hy as kind in die NG kerk was, het hy baie in die Rooms-Katolieke Kerk belanggestel en is ook op universiteit in die Katolieke Kerk gedoop. Hy wou in 'n stadium selfs 'n **monnik** geword het en is in 1961 na Ierland om daar opgelei te word. Hy was drie jaar lank by die **Franciskaanse seminarium**, maar het besluit dat dit nie die regte roeping vir hom was nie en het na Suid-Afrika teruggekeer. Hy het in Bloemfontein verder studeer en het 'n hoër diploma in biblioteekkunde verwerf.



Die hoofgebou van die Universiteit van die Vrystaat in Bloemfontein.

Loopbaan en sterfte

Daarna het hy vir 'n rukkie as vertaler in [Johannesburg](#) gewerk, waarna hy weer na die buiteland gereis het – hierdie keer na Amsterdam in Nederland. Hy het by 'n biblioteek in Amsterdam gewerk en daarna vir 'n ruk lank op verskillende plekke in Europa gewoon en gewerk.

Hy het met sy terugkeer na [Suid-Afrika](#) 'n pos as vertaler in [Pretoria](#) gekry, maar daarna weer na Bloemfontein teruggekeer om as **boekkeurder** by die Vrystaatse Provinsiale Biblioteekdiens te werk. Hy het egter in 1982 'n pos as navorser by die Suid-Afrikaanse Biblioteek in Kaapstad aanvaar en het in die pos gebly tot hy in 1999 na sy geboortedorp, Trompsburg, getrek het.²

Die laaste keer wat hy verhuis het, was in September 2008 toe hy na die Noorderbloem-aftreeoord in Bloemfontein verhuis het. Hy is ook by die aftreeoord oorlede toe hy op 1 Mei 2017 na bewering selfdood gepleeg het. Hoewel die nadoorse ondersoek nie kon bepaal dat dit beslis selfdood was nie, het hy vroeër daardie jaar 'n brief aan sy prokureur gestuur om hom van sy besluit in te lig.

Hy het daarin geskryf dat hy besluit het om sy eie lewe te neem deur “vrywillig

van die gebruik van voedsel en drank af te sien en die lewe deur 'n proses van sogenaamde versterwing te beëindig, wat in die praktyk op **dehidrasie** neerkom". Schoeman het in die brief geskryf dat hy weet dat hy nie baie oud wil word nie en dat hy daarom besluit het om sy lewe "betyds te beëindig of in elk geval probéér beëindig".



Skryfwerk en toekennings

Schoeman het van jongs af van skryf gehou en het gereeld artikels vir die skooljaarblaai geskryf. Sy eerste ongepubliseerde boeke was in Nederlands en Engels, maar hy het vanaf sy vroeë twintigerjare hoofsaaklik in Afrikaans geskryf.

Sy eerste boek, *Veldslag*, is in 1965 gepubliseer. Sy volgende boeke was *By fakkellig*, *'n Lug vol wolke* en *Spiraal* waarvoor hy in 1970 'n Hertzogprys vir prosa gewen het. Hy het in 1972 die CNA-prys vir sy boek, *Na die geliefde land*, gewen. Hy het in 1986 die Hertzogprys en die W.A. Hofmeyr-prys vir *'n Ander land* gewen. In 1995 het hy nóg 'n Hertzogprys vir *Hierdie lewe* gewen en twee jaar later, is hy met die Stals-prys vir Kultuurgeskiedenis bekroon.



Schoeman het ook die Recht Malan-prys vier keer gewen. Dit was vir *Vrystaatse erfenis* (1983), *Dogter van Sion* (1998) en *Armosyn van die Kaap* (2002). Die Universiteit van Kaapstad het in 2000 'n eredoktorsgraad aan hom toegeken vir sy uitstaande bydrae tot die letterkunde en geskiedenis en hy is in 2004 ook met 'n eredoktorsgraad van die Universiteit van die Vrystaat vereer.

Hy is in 2004, saam met André P. Brink en Toek Blignaut, met die Suid-Afrikaanse Letterkundetoekenning vir hul lewensbydrae tot die Suid-Afrikaanse letterkunde vereer.

Schoeman het nie graag onderhoude toegestaan nie en het ook glo nie van groot groepe mense gehou nie. Sy **uitgewer** het gewoonlik sy bedankingstoespraak by toekenningsaande voorgelees, maar die skrywer het wel in 1998 'n uitsondering gemaak om 'n toekenning te ontvang. Dit was toe wyle oudpres. Nelson Mandela die Orde van Ikhamanga aan hom oorhandig het. Schoeman het dié toekenning as

“’n besondere eer vir die Afrikaanse taal” bestempel.

Daar is ook van sy werk vir TV verfilm, soos sy sketse *Die jare*, *Besoek* en *Die somerpaleis*. Schoeman het in 1990 die [SAUK](#)-prys vir die televisiedrama *Op die grens* gewen.

Schoeman se **outobiografie**, *Die laaste Afrikaanse boek*, is in 2003 met die Recht Malan-prys bekroon. Ander pryse wat hy gewen het, is onder andere twee Louis Hiemstra-pryse vir niefiksie, die M-Net-prys vir *Verkenning* en die Prix du Meilleur Livre Etranger-prys vir die beste buitelandse roman in Frankryk vir die vertaling van *Hierdie lewe*.³



Geskiedenis­skrywer

Schoeman was ’n geskiedeniskenner wat glo ’n enorme hoeveelheid inligting kon onthou. Hy het ’n groot bydrae tot ons land se erfenis met die skryf van sy boeke gelewer. Hy het onder andere boeke soos *Bloemfontein: die ontstaan van ’n stad 1846-1946*, *Vrystaatse erfenis*, *Boukunsskatte van die Vrystaat* en *Bloemfontein in beeld 1860-1910* geskryf. Hy was ook die redakteur van die Vrijstatia-reeks oor die 19de-eeuse Vrystaatse geskiedenis en het ’n paar boeke oor sendinggeskiedenis, die vroeë lewe in die Kaap, en **biografieë** (soos oor [Olive Schreiner](#), *Olive Schreiner: ’n Lewe in Suid-Afrika 1851-1881*) geskryf.

Schoeman se skryfwerk

Naam	Literêre vorm	Publikasiedatum	Uitgewer
<i>Veldslag</i>	Novelle	1965, 1971, 1977	Kaapstad: Human & Rousseau
<i>Die hart van die son</i>	Roman	1965, 1968, 1976, 1986	Kaapstad: Human & Rousseau
<i>Van my kontrei</i>	Kortkuns	1938, 1948, 1949	Kaapstad: Nasionale Pers

<i>By fakkellig</i>	Roman	1966, 1970, 1972, 1991	Kaapstad: Human & Rousseau
<i>Berig uit die vreemde: 'n Ierse dagboek</i>	Reisverhaal	1966	Kaapstad: Human & Rousseau
<i>'n Lug vol helder wolke</i>	Roman	1967, 1973, 1993, 1995	Kaapstad: Human & Rousseau
<i>Van 'n verre eiland: 'n tweede Ierse dagboek</i>	Reisverhaal	1968	Kaapstad: Human & Rousseau
<i>Spiraal</i>	Roman	1968, 1971, 1983	Kaapstad: Human & Rousseau
<i>Lig in die donker</i>	Roman	1969, 1974, 1988	Kaapstad: Human & Rousseau
<i>Op 'n eiland</i>	Roman	1971, 1975, 2009	Kaapstad: Human & Rousseau
<i>Na die geliefde land</i>	Roman	1972, 1982, 1988, 1994, 2007	Kaapstad: Human & Rousseau
<i>Eroica</i>	Biografiese roman	1973, 1977	Kaapstad: Human & Rousseau
<i>Helde van die Rooi Tak: die saga van Cucullin en die veeroof van Culne</i>	Legendes	1973	Kaapstad: Human & Rousseau
<i>Die noorderlig</i>	Roman	1975	Kaapstad: Human & Rousseau
<i>Gode, helde en konings</i>	Middeleeuse Ierse kortverhaal	1975	Kaapstad: Human & Rousseau
<i>Besoek</i>	Televisiedraaiboek	1975	Kaapstad: Human & Rousseau
<i>Die somerpaleis</i>	Televisiedraaiboek	1975	Kaapstad: Human & Rousseau

<i>Om te sterwe</i>	Roman	1976	Kaapstad: Human & Rousseau
<i>Finn en sy mense: die avonture van Fianna van Ierland</i>	Legende	1976	Kaapstad: Human & Rousseau
<i>Die jare</i>	Televisiedraaiboek	1976	Kaapstad: Human & Rousseau
<i>Afrika</i>	Roman	1977	Kaapstad: Human & Rousseau
<i>Koninkryk in die Noorde: 'n boek oor Skotland</i>	Reisverhaal	1977	Kaapstad: Human & Rousseau
<i>Onderweg: reisherinnerings</i>	Reisverhaal	1978	Kaapstad: Human & Rousseau
<i>Die walskonings</i>	Roman	1978	Kaapstad: Human & Rousseau
<i>Die hemeltuyn</i>	Roman	1979 1982 1991	Kaapstad: Human & Rousseau
<i>Bloemfontein: die ontstaan van 'n stad 1846-1946</i>	Geskiedenis	1980	Kaapstad: Human & Rousseau
<i>Die reisiger</i>	Roman	1980	Kaapstad: Human & Rousseau
<i>Waar ek gelukkig was</i>	Roman	1981	Kaapstad: Human & Rousseau
<i>Vrystaatse erfenis: bouwerk en geboue in die 19de eeu</i>	Geskiedenis	1982	Kaapstad: Human & Rousseau
<i>Die dood van 'n Engelsman: die Cox- moorde van 1856 en die vroeë jare van die Oranje-Vrystaat</i>	Geskiedenis Biografie	1982	Kaapstad: Human & Rousseau
<i>In liefde en trou: die lewe van president M.T. Steyn en mevrou Tibbie Steyn met 'n keuse uit hulle korrespondensie</i>	Biografie	1983	Kaapstad: Human & Rousseau

<i>'n Ander land</i>	Roman	1984, 2006	Kaapstad: Human & Rousseau
<i>Boukunsskatte van die Vrystaat = Free State Heritage</i>	Geskiedenis	1985	Roodepoort: CUM
<i>Die wêreld van die digter: 'n boek oor Sutherland en die Roggeveld ter ere van NP Van Wyk Louw</i>	Biografie	1986	Kaapstad: Human & Rousseau
<i>Bloemfontein in beeld 1860-1910: Portrait of Bloemfontein 1860-1910</i>	Geskiedenis	1987	Kaapstad: Human & Rousseau
<i>Olive Schreiner: 'n lewe in Suid-Afrika 1855-1881</i>	Biografie	1989	Kaapstad: Human & Rousseau
<i>Veldslag</i>	Televisiedraaiboek	1989	Kaapstad: Human & Rousseau
<i>Afskeid en vertrek</i>	Roman	1990	Kaapstad: Human & Rousseau
<i>Only an anguish to live here: Olive Schreiner and the Anglo-Boer War 1899-1902</i>	Geskiedkundige biografie	1992	Kaapstad: Human & Rousseau
<i>Hierdie lewe</i>	Roman	1993, 2003	Kaapstad: Human & Rousseau
<i>Die kort sendingloopbaan van Sophia Burgmann, 1805-1812</i>	Biografie	1994	Kaapstad: Human & Rousseau
<i>Irma Stern: The Early Years 1894-1933</i>	Biografie	1994	Kaapstad: Suid-Afrikaanse Biblioteek
<i>Die uur van die engel</i>	Roman	1995	Kaapstad: Human & Rousseau
<i>Die wêreld van Susanna Smit 1799-1863</i>	Geskiedkundige biografie	1995	Kaapstad: Human & Rousseau
<i>Die moord op Hesje van der Merwe, 19 Oktober 1837</i>	Geskiedkundige biografie	1995	Kaapstad: Human & Rousseau

<i>A Thorn Bush that Grows in The Path: The Missionary Career of Ann Hamilton, 1815-1823</i>	Biografie	1995	Kaapstad: Suid-Afrikaanse Biblioteek
<i>The Face of The Country: A South African Family Album 1860-1910</i>	Foto-album	1996	Kaapstad: Human & Rousseau
<i>Verkenning</i>	Roman	1996	Kaapstad: Human & Rousseau
<i>J.J. Kicherer en die vroeë sending, 1799-1806</i>	Geskiedenis	1996	Kaapstad: Suid-Afrikaanse Biblioteek
<i>Dogter van Sion: Machtelt Smit en die 18de-eeuse samelewing aan die Kaap, 1749-1799</i>	Geskiedenis	1997	Kaapstad: Human & Rousseau
<i>Verliesfontein</i>	Roman	1998	Kaapstad: Human & Rousseau
<i>Merksteen: 'n dubbelbiografie</i>	Biografie	1998	Kaapstad: Human & Rousseau
<i>Armosyn van die Kaap: voorspel tot vestiging, 1415-1651</i>	Geskiedenis	1999, 2005	Kaapstad: Human & Rousseau
<i>Stamland: 'n reis deur Nederland</i>	Reisverhaal	1999	Kaapstad: Human & Rousseau
<i>Armosyn van die Kaap: die wêreld van 'n slavin 1652-1733</i>	Geskiedenis	2001	Kaapstad: Human & Rousseau
<i>Die laaste Afrikaanse boek</i>	Outobiografiese aantekeninge	2002	Kaapstad: Human & Rousseau
<i>The Griqua Captaincy of Philippolis, 1826-1861</i>	Geskiedenis	2002	Pretoria: Protea Boekhuis
<i>'n Duitser aan die Kaap: die lewe en loopbaan van Hendrik Schoeman</i>	Biografie	2004	Pretoria: Protea Boekhuis
<i>The Early Mission in South Africa, 1799-1819 Die vroeë sending in Suid-Afrika, 1799-1819</i>	Kerkgeskiedenis	2005	Pretoria: Protea Boekhuis

<i>Kinders van die Kompanjie: Kaapse lewens uit die sewentiende eeu</i>	Kaapse geskiedenis	2006	Pretoria: Protea Boekhuis
<i>Early Slavery at the Cape of Good Hope, 1652-1717</i>	Geskiedenis	2007	Pretoria: Protea Boekhuis
<i>Patrисиёrs en prinse: die Europese samelewing en die stigting van 'n kolonie aan die Kaap, 1619-1715</i>	Geskiedenis	2008	Pretoria: Protea Boekhuis
<i>Seven Khoi Lives: Cape Biographies of The Seventeenth century</i>	Geskiedenis	2009	Pretoria: Protea Boekhuis
<i>Handelsryk in die Ooste: die wêreld van die VOC, 1619-1688</i>	Geskiedenis	2009	Pretoria: Protea Boekhuis
<i>Titaan: 'n roman oor die lewe van Michelangelo Buonarroti</i>	Biografiese roman	2009	Kaapstad: Human & Rousseau
<i>Kolonie aan die Kaap: Jan van Riebeeck en die vestiging van die eerste blankes, 1652-1662</i>	Geskiedenis	2010	Pretoria: Protea Boekhuis
<i>Burgers en amptenare: die vroeë ontwikkeling van die kolonie aan die Kaap, 1662-1679</i>	Geskiedenis	2011	Pretoria: Protea Boekhuis
<i>Cape Lives of the Eighteenth century</i>	Geskiedenis	2011	Pretoria: Protea Boekhuis
<i>Riviereiland: twee besoeke aan Nederland</i>	Reisverhaal	2011	Pretoria: Protea Boekhuis
<i>Here en Boere: die kolonie aan die Kaap onder die Van der Stels, 1679-1712</i>	Geskiedenis	2013	Pretoria: Protea Boekhuis
<i>Portrait of A Slave Society: The Cape of Good Hope, 1717-1795</i>	Geskiedenis	2013	Pretoria: Protea Boekhuis
<i>Twee Kaapse lewens: Henricus en Aletta Beck en die samelewing van hul tyd, 1702-1755</i>	Geskiedenis	2013	Pretoria: Protea Boekhuis
<i>Deelstad: 'n boek oor Berlyn</i>	Reisverhaal	2013	Pretoria: Protea Boekhuis

<i>Hoogty: die opbloei van 'n koloniale kultuur aan die Kaap, 1751-1779</i>	Geskiedenis	2014	Pretoria: Protea Boekhuis
<i>Die vrou wat alleen bly: twee draaiboeke</i>	Draaiboek	2015	Pretoria: Protea Boekhuis
<i>Imperiale somer: Suid-Afrika tussen oorlog en unie, 1902-1910</i>	Geskiedenis	2015	Pretoria: Protea Boekhuis
<i>Swanesang: die einde van die Kompanjiesyd aan die Kaap, 1771-1795</i>	Geskiedenis	2016	Pretoria: Protea Boekhuis



Woordbank

bekroonde	Iemand wie se werk 'n prys/medalje ontvang het.
boekkeurder	Persoon wat verantwoordelik is vir die lees van manuskripte wat vir publikasie oorweeg word.
biografieë	Die geskiedenis van iemand se lewe wat beskryf word; lewensbeskrywing.
dehidrasie	Ontwatering.
draaiboek	Manuskrip met handleiding en gegewens vir die maak van 'n rolprent of televisiereeks.
eredoktorsgraad	'n Mens kry 'n eredoktorsgraad vir uitsonderlike prestasies, maar jy hoef nie 'n eksamen af te lê nie.
Franciskaanse	Die term "Franciskaans" verwys na volgelinge van drie ordes binne die Katolieke Kerk wat deur Franciscus van Assisi gestig is.
ghoeroe	'n Kenner.
handelsreisiger	Iemand wat reis om kliënte vir 'n maatskappy te werf.
kortkuns	Alle kort prosawerke soos die kortverhaal, kortkortverhaal of prosa, skets, prosagedig en essay.

legendes	Verhale wat deur oorlewering van geslag tot geslag vertel word.
literêre	Wat met literatuur/letterkunde verband hou.
monnik	Dit is 'n man wat hom aan die wêreld onttrek en hom saam met ander in 'n klooster heeltemal aan die godsdiens wy.
nooiensvan	'n Vrou se van voordat sy trou en haar man se van begin gebruik.
novelle	Kort prosaverhaal wat langer as 'n kortverhaal, maar korter as 'n roman is.
oeuvre	Al die werke van 'n skrywer.
outobiografie	Storie wat iemand self oor sy/haar lewe geskryf het.
prosa	Geskrewe taalgebruik, veral as letterkundige genre.
romans	Lang prosaverhale met karakteruitbeelding en omgewingsbeskrywing.
seminarium	'n Kweekskool (opleidingsentrum) vir predikante.
stilis	Dis 'n skrywer met 'n goeie styl.
swetterjoel	Baie.
televisiedraaiboek	Manuskrip met handleiding en gegewens vir die maak van 'n televisieprogram of -reeks.
uitgewer	Iemand wat boeke laat druk en versprei
verpes	Om nie van iets te hou nie.

Lees dié artikels om meer te leer

- [Schoeman, die stil grensverskuiwer](#)
- [Eerste Helgaard Steyn-prys vir Afrikaanse Letterkunde aan Schoeman toegeken](#)
- [Schoeman se indrukwekkende lys werke](#)

Kyk dié video's om meer te wete te kom

Hulde aan Schoeman

Lokprent van *Promised Land*